

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ إِلَّا اللَّهُ مُحَمَّدٌ رَّسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

26 Juillet 2019

23 Dhul-Qaddah 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor : **DAWAT-I-ALLAH (PARTIE 3)**

ENE DAI-I-ALLAH : SO BANE QUALITÉS

Ene *Dai-i-Allah* (celui ki faire le *Dawat-i-Allah*) so mission c'est donne le message d'Allah, appelle dimounes vers Allah seulement. Faudré pas ki li appelle zot vers bane désirs mondaines ou sois pou tire l'avantage de bane kitchoses ki péna aucaine relation avec bane messages d'Allah. En d'autres mots, mo pé rode dire ki li pas servi le nom d'Allah pou li tire bane bénéfiques de côté mondaine.

Nous, dans le Jamaat Sahih Al Islam, nous appelle le monde vers Allah et sa c'est le but de *Dawat-i-Allah* : c'est pou augmente le nombre de bane dimounes, faire zot gagne le message d'Allah, amène zot dans sa chemin ki amène vers Allah (swt), non pas pou faire bane dimounes croire ki, écoute nous, vine dans nous Jamaat pou gagne bane richesses mondaine. Sa pas pou être ene l'appel vers Allah. Au contraire ou l'appel li bizin tous les temps ene l'appel ki donne la richesse spirituel, ki augmente ou niveau spirituel et celui des autres.

Donc, nous l'invitation c'est seulement pou Allah. À cause sa même chaque membre du Jamaat Ul Sahih Al Islam bizin ki, aparte Allah, li pas mette bane les autres buts là-dans pou ki sa invitation spirituel là pas gâter. Ou bon action li pou

prouver ki oui, ou pé appelle dimounes vers Allah. Si ou accepter la vraie religion, ou besoin appelle dimounes seulement vers Allah, et pas pou donne permission pou cachiette vrai religion, parceki si zot faire sa, si zot pas appelle dimounes vers Allah et cachiette la vérité ki vine d'Allah kot zot dire bane mensonges en prenant le nom d'Allah, alors sa pas pou ene bon parole devant Allah. Li pou ene péché devant Allah. Alors, pensez bien ki le *Dawat-i-Allah* li ene très grand responsabilité, ene très grand engagement ki zot fine entreprendre.

DAWAT-I-ALLAH DEMANDE BOCOUCI PATIENCE

DAWAT-I-ALLAH, c'est ene travail ki demande boucou patience. Pas juste patience, bizin garde ou calme, cause avec douceur, parceki ou pou joindre toute sorte kalités dimounes pou donne le message. Parmi, ena ki la tête brûler, kot ou pou bizin comprend zot l'attitude négative ki zot pou azir avec ou et même pou ena bane menaces avec bane gros mots. Mais ou, ou différent de zot ; c'est ki tout céki ou faire, ou faire sa seulement pou la cause d'Allah et ou pé faire le travail ki ene Messenger de côté d'Allah, faire. Ki kalité persécutions, épreuves, problèmes, blâmes li [sa Messenger d'Allah là] passer ! Dimounes ridiculise li, moque de li, traître li fou, ki li pé faire la sorcellerie, endoctrine zot [bane croyants et bane dimounes en général] et zot famille. Mais ki li et bane croyants faire ? Zot continuer prend patience, jusqu'à finalement l'aide Allah arriver, kot zot sorti victorieux par la grâce d'Allah. Ena dimounes par l'amitié et l'amour ki ou ena pou zot, ou faire zeffort et ou pou donne zot sa vrai message de sa vrai religion là – **l'ISLAM** – et voilà zot vine ou grand l'ennemie et aussi zot barre bane les autres dimounes, empêche zot vine dans chemin ki amène vers Allah (swt). Donc prend patience ; so récompense, so fruit pou bien grand et bien doux sa.

Au commencement, kan ou appelle dimounes vers bon travail, ena ki pas pou écoute ou, pas pou montrer aucaine l'intérêt dans céki ou pé invite zot là et en résultat de sa, sa capave décourage ou et ou capave gagne ene dégoût. Donc, pas bizin gagne dégoût ni décourager. Tenir ferme lors ou paroles et actions et en résultat de ou patience, ou pou gagne bane grand grands récompenses. Kan l'heure là pou arriver kot ou gagne le fruit de ou récompense pou patience ki ou fine prend, alors ou pou gagne ene résultat extraordinaire dans ou *Dawat-i-Allah* sans ki ou attane.

Donc, patience c'est une grande vertu de courage. Patience trouve dans deux places, dans paroles et dans actions. Bane paroles ki ou ena pou dire, continuer dire li. Même si ou ena pou répète sa bane bons paroles là, sa appelle patience de la parole et c'est ki bon, action pas ena pou reculer avec sa. Même ki quantité bane testes vine difficile, pas bizin laisse beauté ou action change en mauvais, donne une vilaine image. Sa deux qualités patience là, zot bizin adopter.

EN RÉSULTAT DE PATIENCE OU GAGNE COURAGE POU FAIRE DOAH.

Avec patience, sa grande force ki ou gagner là, c'est la force de *doah* ki ou faire avec Allah (swt) pou ouvert le cœur de bane dimounes avec ki ou pé faire *Dawat-i-Allah*, kot ou ti pou content ki zot gagne *Imaan* (la foi) lors bane messages divines et croire dans une seul Dieu et So bane messagers et quitte tous bane faux dieux. Temps en temps sa bane *doahs* là sorti dans ou la bouche et au fond de ou le cœur. Dans travail de *Dawat-i-Allah* bane *doahs* sorti avec une la force, et *doah* ena une grande relation avec patience. Et patience c'est sa qualité ki pou amène ou vers *doah*, et li amène ou vers bane *doahs* bien profond même.

DAI-I-ALLAH BESOIN CAUSE AVEC DOUCEUR.

Une bonne qualité ki chaque *Dai-i-Allah* besoin ena dans li c'est ki li bizin cause avec douceur, pas cause avec chaleur. Même si quelqu'un blesse ou dans ou bane conversations, quant à ou, ou agir avec douceur. Si une dimoune ena mauvais caractère, tout so connaissance alle dans vide ; li pas pou capave servi le monde narien. Pou une *Dai-i-Allah*, li bizin une l'exemple, spécialement sa l'heure kan ou pé cause avec bane étrangers, sa l'heure là ou bizin être plus gentil, ou bizin contrôle ou même et avec courage ou écoute paroles ou adversaires et après ou explique li avec l'amour et douceur, ou réponde li so bane questions. Sa li une qualité principale d'une *Dawat-i-Allah* ki si une dimoune li gagne sa, li pou capave combattre bane grands grands connaisseurs/ savants [bane dimounes ki dire ki zot ena connaissances de la religion mais ki en fait pas comme li en profondeur, et dans zot l'ignorance zot égare bane les autres dimounes].

QUAND FAIRE DAWAT-I-ALLAH BESOIN ENA CRAINTE D'ALLAH.

Dans travail mondaines, beaucoup dimounes cause beaucoup sans la crainte d'Allah pou faire zot travail mondaine avancer. Tout causer pou zot et tout kitchose zot

conner. Dans la vie, bizin apprane écouter aussi et bizin cultive sa dans ou, cause dans ene façon, ki pense bien avant ou dire ene mot, attention ene parole ki ou dire, Allah (swt) pas fine content avec ou, et sa parole ki ou fine dire sa dimoune là, attention ou fine blesse li aussi.

Par la grâce d'Allah, Allah (swt) fine montrer nous ki besoin travail avec la crainte d'Allah. Plus ene dimoune ena la crainte d'Allah dans li, pli so paroles faire l'effet. Seulement ruse pas pou faire narien ; la cause sa même bane membres besoin augmente zot qualité *Taqwa* pou zot capave mette poids dans zot paroles.

Donc, avec *Taqwa* ou bane paroles pou ena ene bel poids ki pou faire so l'effet dans zoreille de chaque dimoune ki pé écouter et sa capave amène ene grand changement dans li. *Insha-Allah*.

BANE DAI-I-ALLAH PAS BESOIN ASSIZÉ AVEC TRANQUILITÉ.

Pou faire le monde entier conne sa vrai religion là et rentre dans sa vrai religion là, li pas ene ti responsabilité sa. Sa c'est ene grand travail et ene travail noble ki Allah (swt) fine mette lors nous zépaul. Pas tous dimoune, ni plusieurs Jamaat fine gagne sa responsabilité là avec so guideline. Pour sa, nous besoin prépare nous avec bocou sérieux. Et à part sa, péna aucun chemin. Même ki chaque dimoune besoin faire *Dawat-i-Allah* et tanque ki so zeffort par la grâce d'Allah pas encore commence rapporte so fruits, li pas besoin assise tranquille. Li besoin faire tous so zeffort ensemble avec *doah* kot Allah même pou donne li sa récompense là. *Insha-Allah*.

DAWAT-I-ALLAH ET TENIR FERME.

« Mais bane ki dire : 'Nous Maître, c'est Allah', et ensuite suivre le droit chemin, bane anges dessane lor zot (et dire zot) : 'Pas craindre narien et pas chagrin, mais gagne bon nouvelle Paradis, ki fine promesse ou. Nous ou alliés dans la vie ici-bas, et dans la vie future. Ou pou gagne céki ou envie ; et là-dans ou pou gagne céki ou demander : ene réception de la part de Quelqu'un ki pardonner et gracier.' » (Ha Mim Al-Sajdah 41 : 31-33).

Céki pé dire dans sa verset là ki celui ki affirmer ki c'est Allah so Maître, alors li passe par toute sortes qualités difficultés. En résultat de sa bane difficultés là, zot besoin montrer bocou fermeté et bocou patience aussi.

Pou ena quelques difficultés internes et quelques difficultés externes aussi. En céki concerne saki interne, kan sa dimoune là faire formation de la masse, li traverse dans bane chemins bien difficiles. Lors chaque pas ki li faire, zot dire ki : « *Derrière sa maître ki to pé marcher là, en résultat to manger pou diminuer et to pou tombe dans boucou difficultés et problèmes...* »

Sa c'est bane testes internes par ki sa bane dimoune là traverser et sa même appelle fermeté ki zot montrer pou montrer véracité de zot proclamation et fermeté dans tous qualité difficultés. Zot guette sa bane épreuves là face à face ; zot péna aucun qualité crainte et zot garde croyance ki c'est Allah même ki donne manger et par Li-même ki nous gagne tous bane bénédictions. C'est sa qualité *Dai-i-Allah* ki nous besoin été.

Alors, Ô bane membres du Jamaat Ul Sahih Al Islam, avancer devant, tire sa bane frayeurs ki ena là et change sa bane noirté là en clarté. Et change sa bane tristesses là en tranquillité, et paix parceki sa même fine écrire dans zot destin.

DAWAT-I-ALLAH BIZIN ENA ENE PROFONDE RELATION AVEC ALLAH.

Dawat-i-Allah aussi ena ene profonde relation avec Allah. Pour bane conseils dans sa travail là zot vine efficace, li très important faudré ena ene relation profonde avec Allah kot alors, sa bane qualité dimoune là, bane ki faire le *Dawat-i-Allah*, zot conseil crée ene révolution de bonne action. À cause sa même besoin établir relation avec Allah, pour ki bane dimoune capave gagne sa la lumière d'Allah là.

Deuxième, si ena pou appelle bane dimoune vers Allah, zot besoin appelle avec sa qualité désire personnel là ki couma dire zot même fine fini gagne Allah, et après ki ou fine fini gagne Allah, ou appelle dimoune vers Li. Alors dans sa la voix là [avec sa la voix ki ou pé appelle les autres vers Allah] ena ene l'autre qualité l'honneur. Appelle dimoune vers Allah par obligation, sa la voix là ena ene l'autre sens, et après ki ou fine gagne Allah, l'heure là si ou appelle dimoune vers Allah, sa la voix là ena ene l'autre sens. So détermination et so courage li ene l'autre.

POU DAWAT-I-ALLAH, VRAI ZARMES C'EST DOAH.

Pour *Dawat-i-Allah*, plus grand nécessité, c'est besoin ena désir [*faire Dawat/ tabligh*]. Deuxième nécessité, c'est *doah*. Connaissances, preuves et tous bane les autres kitchoses vine après. Mo fine guette bocou bane illettrés ki pas ti ena bocou connaissance *Deen* mais dans zot paroles, ti ena bon actions et *Taqwa*. Zot ti attacher avec *doah* et zot fine vine bane *Dai-i-Allah* bien réussi. La cause sa même le vrai zarme ki chaque membre Sahih al Islam bizin acquérir et cultive dans li c'est *doah*, parceki sans *doah*, li pas pou capave rester, pareil couma ene poisson sans de l'eau li pas capave vivre, li mort.

Donc, si zot fine rentre dans le terrain de *Dawat-i-Allah* doucement, doucement Allah même pou faire zot formation. Li pou réveil zot mémoire et li pou mette bénédiction dans zot connaissance. Alors le plus grand zarme de *Dawat-i-Allah*, c'est Allah So l'aide, et *doah*. Par l'intermédiaire de *doah*, si ene dimoune ki accepter vrai religion li rentre dans le champ de bataille, alors aucun la force du monde pas pou capave combattre li. La cause sa même mo pé informe nous bane membres du Jamaat Ul Sahih al Islam entier le monde, par sa annonce là, ki si avant zot pas ti *Dai-i-Allah*, alors à partir aujourd'hui zot pé vine ene *Dai-i-Allah*. Lors chaque étape de *Dawat-i-Allah* nous besoin gagne l'habitude de *doah* : Lé temps pé faire *Dawat-i-Allah*, nous besoin faire *doah*, les temps nous retourne la caze nous besoin faire *doah*, nous besoin dire nous zenfants faire *doah*. Si zot concentrer vers *Dawat-i-Allah* avec autant sérieux et zot mette zot le cœur là-dans, et zot faire zot bane zenfants innocents aussi participe là-dans, zot pou guetter couma Allah (swt) pou mélange sa bane zenfants innocents là zot *doah* ensemble avec céki pou zot. Dans zot paroles pou gagne bane grand courage honorable/ noble.

Chaque membre Sahih al Islam bizin commence so travail *Dawat-i-Allah* avec *doah* avec tout le sérieux, et continuellement faire *doah* tous les jours li faire li vine ene obligation. Li faire sa supplication là avec Allah (swt) ki : **« Ô Allah donne nous sa courage là ki nous capave accompli nous responsabilité et sa droit ki nous ena pou vine *Dai-i-Allah*, nous pou capave commence complète li, et Ô Allah donne le monde aussi sa courage là ki zot pou capave écoute nous bane paroles. » Ameen.**